



Univerzitet u Sarajevu  
Sindikata Univerziteta u Sarajevu  
Wilsonovo šetaliste 9, 71000 Sarajevo,  
Bosna i Hercegovina  
Web strana [www.sunsa.ba](http://www.sunsa.ba)

Telefon: ++ 387 33 663 140  
Fax: ++ 387 33 653 055

e-mail: [sindikata@sunsa.ba](mailto:sindikata@sunsa.ba) ili

[sindikata\\_unsa@mef.unsa.ba](mailto:sindikata_unsa@mef.unsa.ba)

Broj: F-08/09  
Sarajevo, 16.4.2009.

## Sindikalnim organizacijama Univerziteta u Sarajevu

Ministarstvo obrazovanja i nauke je svojim dopisom br. 11-07-14-2556.1 od 13.04.2009 god., a dostavljenim 15.04.2009 god. obavijestilo visokoškolske institucije da umanjuje dotacije za mart u iznosu od 21%.

To podrazumijeva umanjenje plaća za 21% i ako se ima u vidu da nisu umanjenje dotacije osnovnim školama (dokazanim borcima za svoja prava!) status zaposlenih na Univerzitetu izgleda onako kako su zaposleni na Univerzitetu dopustili.

U prilogu ovog dokumenta se nalazi pregled plaća zaposlenih na Univerzitetu u Sarajevu i njihov položaj u odnosu na zaposlene u Kantonalnim službama i osnovnim školama. Bilo kakav komentar je suvišan.

Sindikata Univerziteta u Sarajevu je bio jako fleksibilan, predusretljiv prema Vladi Kantona i Ministarstvu obrazovanja i nauke tokom razgovora oko definiranja budžeta za 2009 god. Mislili smo da ako budemo razumni, na nivou tradicije Univerziteta u Sarajevu, ako budemo patriotski raspoloženi u ovim teškim vremenima da ćemo zajednički podnijeti posljedice recesije.

Ni posle više pismenih obraćanja premijeru Vlade Kantona Sarajeva Besimu Mehmediću i telefonskih razgovora sa šefom njegovog Kabineta, više pisama ministru obrazovanja, e-mail i telefonskih razgovora sa sekretaricom, bezuspješnih pokušaja da stupim u kontakt sa sekretarom i pomoćnikom ministra za visoko obrazovanje nisam uspio da dobijem Zapisnik sa razgovora sa predstavnicima Sindikata korisnika budžetskih sredstava koji je održan dana 27.03.2009 god.

Na tom sastanku su premijer Besim Mehmedić i ministar Safet Kešo javno preuzeli neke obaveze, a također i mi predstavnici Sindikata.

**Nažalost, izgleda da davno poznata narodna izreka „Sila samo razumije silu“ je jedino rješenje da se uvažavaju obični ljudi na prostorima Balkana i izgleda i Kantona Sarajeva.**

Članovi Sindikata Univerziteta u Sarajevu treba da izvuku pouku iz ovoga slučaja i da se pripreme na dugotrajnu i iscrpljujuću borbu sa vlašću koja ne poštuje dogovore, ponaša se nadmoćno i osorno prema ljudima koji predstavljaju nadu za Kanton Sarajevo u Bosnu i Hercegovinu u naučnom i pedagoškom smislu.

Ne želeći dostaviti Zapisnik sa tog sastanka oni jasno pokazuju koliko vrijedi javna riječ predstavnika Vlasti i svojim dopisom br. 11-07-14-2556.1 od 13.04.2009 god.

Jasno pokazali da im je samo bio cilj usvajanje Budžeta za 2009 god.

**Sada redovni profesor Univerziteta (1.300 KM) ima manju platu od direktora Osnovne škole, docent ima platu kao rukovaoci opremom u osnovnoj školi, viši asistent (magistar nauka) ima manju platu od nastavnika sa višom stručnom spremom (VI stepen), ili pripravnika u Kantonu, Generalni sekretar Univerziteta, sekretari Fakulteta i Akademija, šefovi službi imaju platu na nivou VI stepena stručne spreme, asistenti kao najbolji od najboljih u obrazovnom procesu su vrednovani kao zaposleni sa srednjom stručnom spremom u Kantonalnim službama i osnovnim školama itd.**

**Morate znati da je u Kantonalnim službama bila praksa da se dodjeljuje stimulacija do 50%, pri čemu su vodili računa da niko sa nižeg platnog razreda ne dobije kao onaj iz višeg platnog razreda. Da bi se to osiguralo, najlakše je da svi imaju stimulaciju od 35-50% i tada nema problema.**

Vrijednost koeficijenta ili kako je zovu „osnovica“ u Kantonu Sarajevu je bila za budžetske korisnike 104 KM. Dio Fakulteta i Akademija su imali vrijednost „osnovice“ 150-165 KM i tu razliku su nadoknađivali svojim van budžetskim prihodima. Vladi Kantona Sarajevo to smeta i kao rezultat takvog stava oni sada kažnjavaju sve zaposlene, one koji imaju svoje vlastite van budžetske



Univerzitet u Sarajevu  
Sindikat Univerziteta u Sarajevu  
Wilsonovo šetaliste 9, 71000 Sarajevo,  
Bosna i Hercegovina  
Web strana [www.sunsa.ba](http://www.sunsa.ba)

Telefon: ++ 387 33 663 140  
Fax: ++ 387 33 653 055

e-mail: [sindikat@sunsa.ba](mailto:sindikat@sunsa.ba) ili

[sindikat\\_unsa@mef.unsa.ba](mailto:sindikat_unsa@mef.unsa.ba)

---

**prihode i one koji nemaju. Oni žele da na taj način unesu razdor među visokoškolske institucije i žele da mi radimo posao Ministarstva obrazovanja i nauke, odnosno Ministarstva finansija i Ministarstva pravde.**

Takav pristup je neprihvatljiv za Sindikat Univerziteta u Sarajevu kada se zna da budžet Kantona Sarajevo finansira samo dio sredstava za rad Fakulteta i Akademija. Dio učešća Kantona Sarajevo iznosi od 30% (Ekonomski fakultet) do 92 % (Akademija likovnih umjetnosti). Ako postoji neke aktivnosti koje nisu u skladu sa zakonima, onda neka to rade odgovarajuće službe, a ne stvaranje uvjeta da se unutar Univerziteta u Sarajevu vodi neka borba za nešto nedefinirano.

Većina docenata (plaća 988 KM), viših asistenata (plaća 821,60 KM) i asistenti (plaća 696,80 KM) imaju kreditne obaveze u iznosu od 400 KM pa naviše, tako da dolazi u pitanje održivosti njihove egzistencije kao ljudskih bića. O potrebi njihovog napredovanja u akademskim zvanjima u skladu sa Zakonom o Visokom obrazovanju, a koji je donijela ova ista Vlada Kantona nema ni govora u ovoj situaciji. Oni imaju rok za koji treba da ispune obaveze, nemaju nikakva prava izuzev da dišu, piju vodu i ponekad jedu. O porodici, ljubavi mladih, smijehu izgleda da je došao kraj na ovom dijelu Balkana.

Sa ovakvim pristupom jasno se nazire kontinuiran proces destrukcije Univerziteta u Sarajevu, rušenje digniteta zaposlenih na Univerzitetu u Sarajevu i stvaranju pretpostavki da u narednom periodu se stvore pretpostavke jačanja privatnih Fakulteta i Univerziteta, a slabljenja javnih visokoškolskih institucija.

Sada Univerzitet u Sarajevu i pojedine visokoškolske institucije su odskočna daska određenim političarima da u sklopu svog mandata u vlasti, uspješno završe doktorske ili magistarske teze, budu izabrani u nastavna zvanja i vjerovatno sutra razmisle o mogućnosti otvaranja svojih Fakulteta ili Univerziteta.

Ako se zna da dio visokoškolskih institucija je raspoređeno na privlačnim lokacijama i raspolažu sa određenim prostorima koji se mogu iskoristiti za „racionalnije“ namjene od obrazovanja mladih ljudi za potrebe društva u cjelini, moguće je u narednom periodu očekivati još zanimljivih poteza (sjetimo se samo prodaje dijela Univerzitetskog kampa Američkoj ambasadi, pri čemu Univerzitet u Sarajevu nije dobio nikakvu nadoknadu).

Kolegice i kolege,

Pred nama je dug, trnovit, ali sigurno uspješan put da prevladamo još jednu prepreku u daljem razvoju naše domovine Bosne i Hercegovine.

Jedino organizirano djelovanje u sklopu Sindikata Univerziteta u Sarajevu, daljim jačanjem Nastavno-naučnih vijeća visokoškolskih institucija, naučnih katedri na visokoškolskim institucijama, borbom za autonomiju svakog segmenta Univerziteta u Sarajevu, uspostavljanja razumnog dijaloga između rektorata i dekana sa Osnovnim organizacijama sindikata i Centralnim odborom Sindikata Univerziteta u Sarajevu možemo očekivati da narednih mjeseci i godina vratimo ponovo dignitet zaposlenih na Univerzitetu u Sarajevu.

Pozivam sve zaposlene na Univerzitetu u Sarajevu da jačaju svoje osnovne organizacije Sindikata, da dobro prouče Zakon o štrajku, da razmotre naše stavove o aktivnostima u narednom periodu koji je pred nama (junski ispiti, upisi studenta, ljetne škole, septembarski ispiti, dopunski ispitni rokovi), pri čemu ni u kom slučaju ne smijemo da nanesimo štetu mladima na Fakultetima i Akademijama, ali ni da ugrozimo egzistenciju naših porodica, Fakulteta i Akademija.

Sve informacije i važne podatke možete naći na web strani [www.sunsa.ba](http://www.sunsa.ba)

Predsjednik Sindikata Univerziteta u Sarajevu

Prof. dr Berko Zečević